



**NOGOMETNI / FUDBALSKI SAVEZ
BOSNE I HERCEGOVINE**

PRAVILNIK O TUŽIOCIMA

Sarajevo, April/Travanj 2013. godine Vanredni broj

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor Nogometnog/Fudbalskog saveza Bosne i Hercegovine, na sjednici održanoj dana 09.04 2013. godine, donio je

P R A V I L N I K

o tužiocima NS/FS BiH

OPĆE ODREDBE

Član 1.

Ovim Pravilnikom uređuje se organizacija, uslovi, način izbora i imenovanja, broj tužilaca, sjedište, nadležnost, način i postupak rada tužioca.

Tužioci

Član 2.

Tužioci su pravno tijelo NS/FS BiH koji svoja ovlaštenja obavljaju samostalno, neovisno i nepristrasno na osnovu Statuta NS/FS BiH, Disciplinskog pravilnika i drugih propisa NS/FS BiH, te važećih statuta FIFA-e i UEFA-e, njihovih propisa i direktiva, kao supsidijarnih propisa.

Organizacija i izbor tužilaca

Član 3.

Nogometni/Fudbalski savez Bosne i Hercegovine ima (3) tri tužioca.

Izbor tužioca se vrši na Skupštini NS/FS BiH iz reda članica NS/FS BiH i to: 2 (dva) tužioca iz NS FBiH i (1) jedan tužilac iz FS RS.

Mandat tužilaca je 4 (četiri) godine, uz mogućnost ponovnog izbora.

Tužioci ne mogu u isto vrijeme biti članovi niti jednog drugog tijela NS/FS BiH.

Uslovi za izbor tužilaca

Član 4.

Uslovi za izbor tužilaca su:

1. da je državljanin Bosne i Hercegovine,
2. da je diplomirani pravnik sa položenim pravosudnim ispitom,
3. da ima najmanje 4(četiri) godine iskustva u struci,
4. da ispunjava ostale uvjete propisane stavom 1. člana 19. Statuta NS/FS BiH.

Sjedište tužilaca

Član 5.

Sjedište tužilaca je u sjedištu Nogometnog/Fudbalskog saveza Bosne i Hercegovine u Sarajevu.

Službeni jezik i pismo

Član 6.

Službeni jezici su jezici definisani Ustavom BiH uz ravnopravnu upotrebu latiničnog i ćiriličnog pisma.

Sekretar tužilaca

Član 7.

Tužioci imaju sekretara kojeg imenuje Generalni sekretar NS/FS BiH iz reda uposlenih u NS/FS BiH. Sekretar tužilaca vodi zapisnik sjednice i obavlja sve druge administrativno-tehničke poslove potrebne za rad tužilaca.

NADLEŽNOSTI

Član 8.

Tužioci su pravno tijelo NS/FS BiH nadležno za provođenje istrage za počinjene prekršaje iz nadležnosti NS/FS BiH i gonjenje počinitelja prekršaja pred nadležnim organima NS/FS BiH, a sve u skladu sa Disciplinskim pravilnikom i drugim primjenjivim propisima.

Član 9.

Tužioci u disciplinskim postupcima zastupaju interese NS/FS BiH, te su ovlašteni izjaviti pravne lijekove na odluke disciplinskih organa NS/FS BiH a sve u cilju zaštite zakonitosti pravnih akata i interesa NS/FS BiH.

Član 10.

Tužioci su dužni da samostalno, na prijedlog IO NS/FS BiH, Predsjednika i predsjedavajućih pravnih tijela NS/FS BIH sprovedu istragu o disciplinskim prekršajima, te da o rezultatima istrage obavijeste podnosioca zahtjeva radi preduzimanja disciplinskog gonjenja počinitelja prekršaja.

Ukoliko smatraju da je odlukama disciplinskih organa prekršen Statut i drugi propisi NS/FS BiH, tužioci mogu izjaviti pravne lijekove ili sprovesti istragu a u cilju utvrđivanja nezakonitosti u donošenju odluka te podnijeti prijavu protiv počinitelja prekršaja.

Tužioci uz saglasnost Predsjednika NS/FS BiH mogu zastupati NS/FS BiH pred nadležnim Arbitražnim sudom i drugim sudovima i disciplinskim postupcima koji se vode pred organima FIFA-e i UEFA-e.

RAD I NAČIN DONOŠENJA ODLUKA

Član 11.

Tužioci donose Odluke na sjednicama.

Sjednicu može sazvati svaki tužilac, Predsjednik i Generalni sekretar NS/FS BiH posredstvom sekretara tužilaca. Sjednica se saziva pismenim pozivom, najmanje 3 (tri) dana prije održavanja sjednice.

Sjednicom vijeća predsjedava jedan od tužilaca, na način da se predsjedavajući određuje u pravilu abecednim redom ili sporazumom tužilaca.

O spriječenosti da prisustvuje sjednici tužioc je dužan blagovremeno obavijestiti sekretara tužilaca, odnosno Sekreterijat NS/FS BiH.

Za rad i donošenje Odluka potrebno je prisustvo najmanje (2) dva tužioca.

Tužilac izvjestilac preuzima u rad predmet, obrađuje ga i predlaže Odluku o istom, te vrši zastupanje pred nadležnim disciplinskim tijelima NS/FS BiH i drugim nadležnim tijelima i organima.

Raspored dodjele predmeta se vrši u pravilu abecednim redom ili sporazumom tužilaca.

Odluke tužioci donose u pravilu konsezusom, a u slučaju nepostojanja konsenzusa većinom glasova od ukupnog broja prisutnih tužilaca.

Tužioci mogu donijeti Odluku pismeno ili posredstvom komunikacije mail-om, ako se postupku i odluci ne protivi niti jedan tužilac. O tome se obavezno sačinjava zapisnik koga na narednoj sjednici potpisuju svi tužioci.

SUKOB INTERESA I RAZRIJEŠENJE

Član 12.

U slučaju sukoba interesa ili u slučajevima kada bi se tužilac mogao izuzeti iz istrage i postupanje u disciplinskoj stvari, taj tužilac je dužan obavijestiti ostala dva tužioca ili Predsjednika NS/FS BiH, nakon čega će u tim disciplinskim stvarima postupati preostala dva tužioca.

Ukoliko tužilac neuredno vrši tužilačku funkciju, odnosno ako bez opravdanog razloga:

- a) ne preuzima u rad predmet koji mu je dodijeljen,
- b) neopravdano odbija vršenje poslova i zadataka koji su mu povjereni,
- c) propušta ili kasni na zakazane sjednice tužioca ili sjednice disciplinskih tijela u predmetima koje zastupa,
- d) u drugim slučajevima koji predstavljaju neuredno vršenje poslova i time onemogućava rad tužioca,

Jedan ili preostala dva tužioca i Predsjednik NS/FS BiH mogu predložiti njegovo razrješenje i imenovanje drugog tužioca.

POSTUPAK

Prijava i odluka o sprovođenju istrage

Član 13.

Prijavu za pokretanje disciplinskog postupka mogu podnijeti IO NS/FS BiH i Predsjednik NS/FS BiH, pravna tijela NS/FS BiH, nadležna tijela i organi FIFE-e i UEFE-e.

Ukoliko utvrde da postoje osnovane sumnje da je prekršaj učinjen tužiocu donose odluku o sprovođenju istrage.

Odluka o sprovođenju istrage treba da sadrži: podatke o počiniocu prekršaja ukoliko su poznati, opis prekršaja iz kojeg proizilaze zakonska obilježja učinjenog prekršaja, zakonski naziv prekršaja, okolnosti koje potvrđuju osnove sumnje za sprovođenje istrage.

U odluci će tužiocu navesti koje okolnosti treba istražiti i koje istražne radnje treba sprovesti.

Član 14.

U cilju otkrivanja počinioca i sprovođenja istrage tužiocu mogu preduzeti sljedeće mjere:

- izdati naredbu za dostavu dokumentacije od svih organa i tijela NS/FS BiH;
- saslušati svjedoke;
- odrediti sprovođenje vještačenja;
- ispitati osumnjičenog;
- zatražiti od nadležnih državnih organa dostavu zapisnika o uvidaju, izvještaje i drugu relevantnu dokumentaciju;
- u slučaju postojanja osnova sumnje da se radi o krivičnom djelu, podnijeti izvještaj nadležnom tužilaštvu radi poduzimanja krivičnog gonjenja.

Svi članovi i organi NS/FS BiH su dužni nakon pokretanja istrage, na zahtjev tužioca dostaviti traženu dokumentaciju i odazvati se na poziv za saslušanje i ispitivanje.

Član 15.

Tužiocu završavaju istragu kada su provedene sve potrebne radnje propisane Statutom NS/FS BiH, Disciplinskim pravilnikom NS/FS BiH i ovim Pravilnikom, a stanje u istrazi je dovoljno razjašnjeno da se može pokrenuti postupak pred nadležnim disciplinskim tijelima ili obustaviti postupak.

Generalni sekretarijat NS/FS BiH je dužan da najkasnije u roku od 30 (trideset) dana od zahtjeva tužioca, dostaviti traženu dokumentaciju i osigurati saslušanje prijavljenog i eventualnih svjedoka.

Rok završetka istrage je 6 (šest) mjeseci sa mogućnošću produženja za narednih 6 (šest) mjeseci u složenim predmetima.

Odluka o nesprovođenju istrage

Član 16.

Tužiocima neće donijeti odluku o sprovođenju istrage ako je iz prijave i pratećih spisa očigledno da prijavljeni prekršaj nije prekršaj, ako ne postoje osnovi sumnje da je prijavljena osoba učinila prekršaj, ako je nastupala zastarjelost gonjenja ili ako postoje druge okolnosti koje isključuju gonjenje.

O nesprovođenju istrage tužiocima su dužni obavijestiti podnosioca prijave.

Odluka o obustavi istrage

Član 17.

Tužiocima će donijeti Odluku o obustavi istrage kada iz prikupljenih dokaza ne proizilazi osnovana sumnja da je osumnjičena osoba počinila prekršaj ili u slučaju smrti te osobe ili prestanka postojanja pravnog subjekta i organizacije.

Postupak pred disciplinskim organima

Član 18.

Ako nakon sprovedene istrage utvrde da postoje osnovana sumnja da neka osoba ili organizacija podliježe disciplinskoj odgovornosti shodno odredbama Disciplinskog pravilnika NS FS BiH tužiocima pokreću postupak pred nadležnim disciplinskim organima NS/FS BiH.

Član 19.

Tužiocima imaju ovlaštenje da na odluke disciplinskih tijela samostalno ulažu pravne lijekove i izjavljenu žalbu zastupaju pred drugostepenim tijelima, kao i da izjavljuju vanredne pravne lijekove na odluke drugostepenih organa.

Sekretar tužioca je obavezan sve Odluke disciplinskih tijela dostaviti tužiocima, kako bi oni ukoliko nađu da je to potrebno izjavili pravne lijekove na iste.

Tužiocima se o pravu na žalbu izjašnjavaju pismenim putem uključujući i sredstvom komunikacije mail-om, ako se postupku i Odluci ne protivi niti jedan tužioc. O tome se uredno sačinjava zapisnik koga na narednoj sjednici potpisuju svi tužiocima.

PRELAZNE I ZAVRŠNE ODREDBE

Član 20.

Ovaj Pravilnik stupa na snagu i primjenjuje se osam dana od objave u Službenom glasniku NS/FS BiH „Nogomet/Fudbal BiH“.

PREDSJEDNIK

Elvedin Begić